

Mensch / ist gewis / denn er sol Predigen vnd
Messia sein / wie er sagt im andern vers / Sie
toben wider den HErrn vnd seinen Messia.
Das er aber Gott sey / beweiset das der Va-
ter sagt. Du bist mein son / heute hab ich dich
gezeuget. Wie wir Christen das wol wissen.
Item das er jm gibt / den gantzen erdboden
zu eigen / mit Heiden vnd was drinnen ist /
welches eben so viel ist / als Gottes eigen reich.

Item er befihet / sie sollen den son küsa-
sen oder anbeten / jm dienen mit furcht. Vnd
schleusst / das selig sind alle die jm vertrauen /
Welchs allein Gotte zu gehöret. Ob sie jm
nicht alle gehorchen / nach dem Euangelio /
bricht seiner Herrschafft vber alle Creaturen
nichts abe. Wer nicht vnter jm sein wil mit
gnaden / der mus vnter jm sein mit vngnaden.
Wer nicht mit jm regirn wil / der mus (wie
seine feinde) seiner füsse schemel sein / Er ist
richter vber lebendige vnd todten / Meinstu /
ob der Türcke / Papst / Juden vnd der gantze
böse hauffe der welt vnd Teuffel / seiner gna-
den nicht wollen / sondern da wider toben /
Sie werden / drumb seiner gewalt entgehen.
Das werden sie wol erfahren. Denn Gott spot-
tet jr im Himel / vnd wird in seinem zorn mit
jnen reden. Summa / Er ist Herr vnd bleibt
Herr / So weit Gott selbs Herr ist / denn er
hat jm die Herrschafft vber alles gegeben /
Die